

APELACIONI SUD BRČKO DISTRIKTA
BOSNE I HERCEGOVINE
Broj: 96 o K 025283 11 Kž 4
Brčko, 27.04.2011. godine

Apelacioni sud Brčko distrikta Bosne i Hercegovine u vijeću sastavljenom od sudija Ruže Gligorević, kao predsjednika vijeća, Ilje Klaić i Dragane Tešić, kao članova vijeća, uz učešće Ljiljane Lukić, kao zapisničara, u krivičnom predmetu osumnjičenog M.G. iz O., R. S., zbog krivičnog djela Neovlaštena proizvodnja i stavljanje u promet opojnih droga iz člana 232. stav 1. i krivično djela Navođenje na prostituciju iz člana 207. stav 1. u vezi sa članom 54. i 31. Krivičnog zakona Brčko distrikta Bosne i Hercegovine („Službeni glasnik Brčko distrikta BiH“, broj 10/03), odlučujući o žalbama Tužilaštva Brčko distrikta Bosne i Hercegovine i branioca osumnjičenog - advokata Dragane Vuković iz Kancelarije za pravnu pomoć Brčko distrikta Bosne i Hercegovine, izjavljenim protiv rješenja Osnovnog suda Brčko distrikta Bosne i Hercegovine broj: 96 o K 025283 11 Kpp od 21.04.2011. godine, na sjednici vijeća održanoj dana 27.04.2011. godine, donio je slijedeće

R J E Š E N J E

Žalba Tužilaštva Brčko distrikta Bosne i Hercegovine izjavljena protiv rješenja Osnovnog suda Brčko distrikta Bosne i Hercegovine broj 96 o K 025283 11 Kpp od 21.04.2011. godine **SE ODBIJA**, kao neosnovana.

Žalba branioca osumnjičenog M.G. se **UVAŽAVA** i rješenje Osnovnog suda Brčko distrikta Bosne i Hercegovine broj 96 o K 025283 11 Kpp od 21.04.2011. godine **u dijelu kojim je prema istom određen pritvor po rješenju Suda Bosne i Hercegovine broj S1 3 K 004148 11 Eks od 07.03.2011. godine, UKIDA.**

O b r a z l o ž e n j e

Rješenjem Osnovnog suda Brčko distrikta Bosne i Hercegovine broj: 96 o K 025283 11 Kpp od 21.04.2011. godine prema osumnjičenom M.G. (u daljem tekstu: osumnjičeni) odbijen je prijedlog za produženje pritvora, a istovremeno je određeno da prema osumnjičenom počev od momenta isteka pritvora po prethodnom rješenju (14.04.2011. godine od 15,30 sati) počinje teći pritvor po rješenju Suda Bosne i Hercegovine broj S1 3 K 004148 11 Eks od 07.03.2011. godine.

Protiv navedenog rješenja Osnovnog suda Brčko distrikta Bosne i Hercegovine žalbu je blagovremeno izjavilo Tužilaštvo Brčko distrikta Bosne i Hercegovine zbog pogrešno utvrđenog činjeničnog stanja i branilac osumnjičenog zbog bitne povrede odredaba krivičnog postupka.

Ovaj sud je ispitao pobijano rješenje u granicama žalbenih navoda u smislu člana 306. Zakona o krivičnom postupku Brčko distrikta Bosne i Hercegovine („Službeni glasnik Brčko distrikta BiH“ broj 44/10-prečišćeni tekst - u daljem tekstu: ZKP BD BiH) i odlučio kao u dispozitivu iz slijedećih razloga:

Neosnovano se žalbom Tužilaštva Brčko distrikta Bosne i Hercegovine dovodi u pitanje pravilnost pobijanog rješenja kojim je odbijen prijedlog za produženje pritvora prema osumnjičenom M.G. Naime, pravilno je prvostepeni sud utvrdio činjenicu da prema službenoj zabilješci Policije Brčko distrikta Bosne i Hercegovine nije poznato, a niti je izvjesno kada će kompletan dokazni materijal (prisklušivani razgovori) biti snimljen od strane Državne agencije za istrage i zaštitu Bosne i Hercegovine i nakon toga dostavljen Policiji Brčko distrikta Bosne i Hercegovine. S obzirom da Tužilaštvo nije obrazložilo konkretne razloge zašto Državna agencija za istrage i zaštitu Bosne i Hercegovine nije u periodu od tri mjeseca (koliko se osumnjičeni nalazi u pritvoru) dostavilo dokazni materijal, a ista je takođe organ koji je dužan da postupa sa posebnom hitnošću u smislu člana 131. ZKP BD BiH, svako dalje zadržavanje u pritvoru osumnjičenog bi bilo u suprotnosti sa navedenom odredbom u dijelu koji propisuje da trajanje pritvora mora biti svedeno na najkraće nužno vrijeme.

Žalbom branioca osumnjičenog se osnovano ukazuje da Osnovni sud Brčko distrikta Bosne i Hercegovine nije stvarno nadležan da osumnjičenog dalje zadržava u pritvoru po osnovu rješenja Suda Bosne i Hercegovine broj S1 3 K 004148 11 Eks od 07.03.2011. godine (da mu određuje pritvor po osnovu navedene odluke), jer je za izvršenje tog rješenja nadležan sud koji je donio tu odluku, odnosno Sud Bosne i Hercegovine.

Slijedom prethodno navedenog, prvostepeno rješenje je u dijelu kojim je osumnjičenom određen pritvor (ili produžen) po osnovu rješenja Suda Bosne i Hercegovine broj S1 3 K 004148 11 Eks od 07.03.2011. godine je valjalo ukinuti bez upute o ponovnom odlučivanju, jer nije bilo zakonskih uslova za donošenje takve odluke. Međutim, svakako postoji obaveza prvostepenog suda da u koordinaciji sa Sudom Bosne i Hercegovine obezbjedi izvršenje rješenja tog Suda broj S1 3 K 004148 11 Eks od 07.03.2011. godine, što prvenstveno podrazumijeva obavještenje Suda Bosne i Hercegovine da je prema osumnjičenom odbijen prijedlog za produženje pritvora koji je određen i produžavan po rješenjima Osnovnog suda Brčko distrikta Bosne i Hercegovine u predmetu broj 96 0 K 025283 11 Kpp, nakon čega bi slijedilo i preuzimanje osumnjičenog od strane nadležnih organa koji istog trebaju sprovesti u pritvorsku jedinicu Suda Bosne i Hercegovine.

U skladu sa predhodno iznesenim valjalo je odlučiti kao u izreci rješenja, a na osnovu člana 321. u vezi sa članom 322. Zakona o krivičnom postupku Brčko distrikta Bosne i Hercegovine.

ZAPISNIČAR,

Ljiljana Lukić

PREDSJEDNIK VIJEĆA,

Ruža Gligorević